

KINAHANGLAN SIGURADO

KA SA DIOS



Ug mabasa Kini nga ingon niini.

Ug si Elias ang Thisbinhon, nga uban sa . . . usa ka pumoluyo sa Galaad, miingon kang Ahab, Ingon nga buhi ang GINOONG Dios sa Israel, sa kang kinsang atubangan ako nagatindog, walay tun-og bisan ulan niining tulo ka tuig, kondili sumala sa akong pulong.

Ug ang pulong sa GINOO midangat kaniya, nga nagaingon,

Pahawa ka dinhi, ug lumiso ka padulong sa silangan, ug magtago ka sa sapa sa Cherith—sa Cherith (ang buot ko diay pasabot) nga anaa sa Jordan.

Ug mahitabo, nga ikaw magainom gikan sa sapa; ug gisugo ko ang mga langgam nga uwak sa pagpakaon kanimo . . .

Busa siya miadto ug naghimo sumala sa pulong sa GINOO: kay siya miadto ug mipuyo sa duol sa sapa sa Cherith, nga anaa atbang sa Jordan.

Ug ang mga langgam nga uwak nanagdala kaniya sa tinapay ug sud-an sa buntag, ug tinapay ug sud-an sa hapon; ug siya nag-inom gikan sa sapa.

Ug nahitabo sa wala madugay, nga ang sapa namala, tungod kay walay ulan sa yuta.

Ug ang pulong sa GINOO midangat kaniya, nga nagaingon,

Tindog, ug umadto ka sa Sarepta, nga sakup sa Sidon, ug magpuyo ka didto: ania karon, ako nagsugo sa usa ka balo nga babaye didto sa pagpakaon kanimo.

Busa siya mitindog ug miadto sa Sarepta. Ug sa paghianha niya sa ganghaan sa siyudad, ania karon, usa ka balo nga babaye didto nangahoy: ug iyang gitawag siya, ug miingon, Dad-i ako, ako nagahangyo kanimo, ug madiyutay nga tubig sa usa ka sudlanan, aron ako makainom.

Ug sa diha nga nagapadulong siya sa pagdala niana, iyang gitawag siya, ug miingon, Dad-i ako, nagahangyo ako kanimo, og usa ka tibuok nga tinapay sa imong kamot.

Ug siya miingon, Ingon nga ang GINOO nga imong Dios buhi, wala akoy usa ka tibuok nga tinapay, apan usa ka kumkom nga harina anaa sa tadyaw, ug usa ka diyutayng lana anaa sa tibud-tibod: ug, ania karon, ako namunit niining duha ka lugas nga kahoy, aron sumulod ug magluto niana alang kanako ug alang sa akong anak nga lalaki, aron kan-on namo kini, ug mamatay.

Ug si Elias miingon kaniya, Ayaw kahadlok; lakaw ug buhata ingon sa imong gipamulong: apan buhati ako didto sa usa ka diyutayng tinapay pag-una, ug dad-a nganhi kanako, ug sa tapus niana pagbuhat alang kanimo ug . . . sa imong anak nga lalaki.

Kay kini mao ang gipamulong sa GINOONG Dios sa Israel, Ang tadyaw sa harina dili mahutdan, ni mahutdan ang tibud-tibud sa lana, hangtud sa adlaw nga ang GINOO magapaulan sa ibabaw sa yuta.

Ug siya miadto sa sulod ug nagbuhat sumala sa pulong ni Eliseo: ug siya, ug siya, ug ang mga kauban sa iyang balay, mingkaon sulod sa daghang mga adlaw.

Ug ang tadyaw sa harina wala makulang, ni mahutdan ang tibud-tibud sa lana, sumala sa pulong sa GINOO, nga gipamulong pinaagi kang Elias.

Alang sa niining buntag nga pagpanghisgot, sa dili pa ako mobiyahe sa ubang nasud, nagpili ako og usa ka teksto, bahin niini: *Kinahanglan Sigurado Ka Sa Dios.*

² Ug karon, Ginoo, panalangini ang Imong Pulong sa diha nga ginapahayag Kini, ug hinaut nga okupahon sa Balaang Espiritu ang among mga hunahuna ug mga panghunahuna, ug iandam kami alang sa Iyang pagduaw, sa dihang ginahangyo namo Siya nga moanhi. Kay wala kami nagaanhi sa balay sa Ginoo aron nga makita, o aron makigkita, kondili aron nga makakat-on Kanimo, ug aron nga maila ang Imong kinaiya, ug ang Imong mga pamaagi, ug ang Imong mga katuyoan, aron nga mahimo namong atubangon ang mga problema sa kinabuhi, nga may usa ka tinuod nga kasiguradohan, ingon nga sigurado gayud sa Dios. Itugot kini, Ginoo. Sa Ngalan ni Jesus ginapangamuyo namo kini. Amen.

³ Siguradong usa kadto ka makahahadlok nga buntag. Mainit ug abogón kaniado, ug atua ang mga tawo sa dalan, nga gigutom, ug mikaging na kaayo kaniadto ang yuta ug andam nang masunog. Ang kadto tanan nagareplektar lang sa ilang mga kasal-anan ug sa pagkaunlod sa ilang moralidad.

⁴ Nakita n'yo, si Ahab ang nagahari kaniadto sa—sa Israel, niadtong panahona, o ibabaw sa Israel, ug siya ang pinakadautan sa tanang mga hari sa Israel. Wala pa nagkaaduna og hari nga ingon ka dautan nga sama ni Ahab, kay siya, ingon nga natudloan na ug nakahibalo sa kung unsa ang maayo, wala

siya napakyas sa padayon nga pagpasuko sa Dios sa tanan nga gipanghimo niya. Bisan pa nga aduna siya kaniadto og lig-on nga pang-militar nga sistema, ug nagmauswagon kaniadto ang mga tawo ilalum sa iyang paghari, apan, bisan pa niana, dili mo mahimong pasukoon ang Dios ug molaum nga hataas nga panahon mong malutsan kini.

⁵ Ug dayon, diha sa iyang pagminyo, imbis nga magpakigminyo sa usa nga gikan sa mismo niyang mga katawhan, miadto siya sa pikas grupo ug nakigminyo sa usa ka makasasala, usa ka magsisimba sa diosdios, nagasimba sa mga diosdios. Nakigminyo siya kang Jezabel. Ug dili kini usa ka magtotoo.

⁶ Ug wala gayu'y magtotoo ang puede nga makigminyo sa usa ka dili-magtotoo, ilalum sa bisan unsa pa man nga sitwasyon. Kinahanglan nga magtotoo gayud ang kanunay'ng pakaslan.

⁷ Apan gibuhat ni Ahab kining dautan nga butang. Ug walay pagduhaduha nga usa ka matahum nga babaye si Jezabel. Ug nahulog si Ahab sa kung unsa ang hitsura ni Jezabel, imbis sa kung unsa gayud si Jezabel. Dinha ang daghan kaayong mga tawo, nagakasayup sa mao rang pagkasayup, hangtud ning panahona.

⁸ Ug gidala sa maong babaye ngadto sa nasud ang pagsimba sa diosdios, sa taliwala sa katawhan. Ug ang mga tawo, ang mga pari, ang ilang mga ministro, nabiktima sa niining magamhanon nga dikta sa kadaghanan.

⁹ Ug kini mismo ang pinakahulagway sa atong nasud sa karon. Nangahulog kita sa dikta sa kadaghanan. Walay pagduhaduha nga gidahum sa mga pari nga okey lang kadto, basta nga giokehan kini sa ilang gobyerno. Apan dili ko igsapayan kung unsa man ang giokehan sa gobyerno, kini kinahanglan kung unsa ang giokehan sa Dios. Ug nagdahum ang mga tawo nga mamahimong okey lang kung makigsalmot man sila sa pipila sa ilang kalibutanong mga butang.

¹⁰ Ug mahimong adunay mohangyo kanako nga balikan kung unsa kadtong bag-o ko lang giingon, nga usa kadto ka kapareho mismo nga hulagway sa karon. Mahimong wala nato ginahunahuna nga nagasimba kita sa mga diosdios, apan ingon niana gyud kita. Ug ang gobyerno ang nagapasiugda niini. Mga magsisimba na sa mga diosdios ang mga tawo sa karon, tungod kay sila—sila nagasimba sa mga diosdios. Ang uban kanila nagasimba sa mga artista sa pelikula, ingon nga mga diosdios. Ang uban kanila nagasimba na sa kuwarta, ingon nga mga diosdios. Ug ang uban nagasimba sa mga artista sa telebisyon, ingon nga mga diosdios. Apan ang tanan nga mas ginauna mo kay sa Dios mao'y usa ka diosdios, bisan unsa pa man kini.

¹¹ Bisan gani si Satanas, ang daku natong kaaway, pagkamaalisto gayud, hangtud nga nahimo pa gani niya,

usahay, nga mapahiuna ang iglesia kay sa Dios. Mahimong aduna kamo og usa ka dakung iglesia. Mahimong usa kini ka dakung bilding, o mahimong usa kini ka dakung denominasyon. Ug, usab, mahimong usa kini ka dakung kongregasyon, apan ayaw tugoting may mas mauna ayha ang Dios, diha sa imong kasingkasing. Ang bisan unsa man nga butang, nga mauna ayha ang Dios, mao'y usa ka diosdios.

¹² Ug nahibalo kini nga mga tawo nga dili na sila og ingon ka espirituhanon sama kaniadto, ilalum sa paghari sa uban pa niadtong mga hari. Ug nanagdahum sila, nga tungod lang kay usa sila ka relihiyoso nga nasud, mamahimong okey lang ang tanan. Ug sa ingon nianang paagi usab nga midangat kita sa niana nga kahimtang.

¹³ Pila ka bulan kaniadto nagapakigsulti ako sa usa ko ka maayo kaayong higala. Ug miingon siya, “Igsoong Branham, nagatoo ako nga ginaataki mo na og ayo kining Estados Unidos.” Ingon niya, “Kanunay mong ginamakmak ang kasal-anan ug kung unsa nga pagasilotan sa Dios kini nga nasud.”

¹⁴ Ingon ko, “Kinahanglan Niyang buhaton kini, aron mamahimong makatarunganon.”

Miingon siya, “Apan, Igsoong Branham, nalimtan mo nga nahitukod kini nga nasud diha sa mga Kasulatan. Ug nangabot dinhi ang atong mga katigulangan, ug gihatag kanato sa Dios kini nga panulondon. Ug usa kita ka relihiyosong nasud.”

¹⁵ Ingon ko, “Matuod kana, ang tanan niana. Ug walay nakahibalo kung giunsa ko pagpasalamat sa niini nga nasud! Apan, tan-awa, igsoon ko, pinili man pud sa Dios ang Israel, ug Iya siyang gipadalhan og mga propeta ug halangdong mga kalalaken-an. Apan dili maagwanta sa Dios ang kasal-anan. Gipaani Niya sa Israel ang matag lugas nga gipangpugas nila kaniadto. Ug kung gipaani Niya sa Israel kung unsa ang iyang gipugas niini, ipaani Niya usab kanato kung unsa ang atong gipangpugas. Wala Siya'y tawo nga pinalabi.”

¹⁶ Ug miabot kita sa maong punto aron maghunahuna nga tungod nagasalig na kita sa kung unsa ang gibuhat sa atong mga katigulangan, o kung unsa ang gibuhat kaniadto sa halangdon nga mga magtutukod sa atong mga iglesia, kung unsa kaniadto kadaku ang ilang mga pagsakripisyo ngadto sa Dios, nga maayo gayud ug bug-os gayud nga ginapasalamatan, apan dili kita makaangkon og kaluwasan gikan sa kung unsa ang ilang mga gipangbuhat kaniadto! Ang kaluwasan mao'y usa ka pang-individual nga butang tali sa kada tawo ug sa Dios. Dili nga sa nasud, sa atong iglesia, kondili ang atong mga kaugalingon sa atubangan sa Dios, manubag kita.

¹⁷ Miabot na kini sa punto nga kahimtang sa atong nasud, hangtud nga bisan sa taliwala na sa pinaka-espirituhanon nga mga tawong aduna kita, moadto ka sa maong espirituhanong

mga kalalaken-an ug kababayen-an, ug makaplagan mo dinha sa ilang kasingkasing nga aduna sa kung unsang butang nga kulang.

¹⁸ Kami, niining ulahing pipila ka mga semana, gisusi ko ang pipila sa niining mga butanga, ug nahibaloan ko nga ang mga kalalaken-an nga abi ko nga mga binhi na, bisan pa niana nakaplagan ko nga ginahatagan nila og mas importansiya ang mga butang nga lumalabay lamang, nagalibot-libot ug nagaingon, “Gihatagan ako sa Dios og pinakadakung *ingon niini-og-ingon niana*. Naghatag ang Dios og. . .” Nagapakaaron-ingnon ka lang.

¹⁹ Ang dagkung materyal nga mga butang dili sa kanunay anaa sa kabubut-on sa Dios. Nagapaulan ang Dios ngadto sa mga matarung ug sa mga dili-matarung. Apan ang gikinahanglan sa kalibutan sa karon dili ang usa ka pagpaaron-aron diha sa pagtoo, aron paninguhaon nga patoohon ang imong kaugalingon sa usa ka butang ug tawgon kining espirituwal.

²⁰ Mamuhat usahay ang pagtoo og dagkung mga milagro, ug sa gihapon dili kini nagagikan sa usa ka espirituhanong kasingkasing. Dili ba nag-ingon man ang atong Ginoo? “Daghan ang mangduol Kanako, nianang adlaw, ug moingon, ‘Dili ba nga gibuhat ko ang *ingon niini* ug *ingon niana*, sa Imong Ngalan?’ Ug magaingon Ako kanila, ‘Pahawa kamo Kanako, kamong mga mamumuhat og kadautan.’” Unsa ba ang kadautan? Butang kini nga nahibalo ka nga husto mong buhaton ug wala mo buhata. “Wala Ko gayud kamo maila,” ang ingnon Niya. Ug nagapuyo na kita nianang adlaw.

²¹ Ang gikinahanglan nato sa karon dili og daghan nga materyal nga mga butang. Aduna kita niana. Wala kita nagkinahanglan og dagku pa nga mga simbahan. Wala kita nagkinahanglan og dagku pa nga mga kongregasyon. Wala kita nagkinahanglan og mas dugang nga maanaa sa radyo ug telebisyon. Wala kita nagkinahanglan og ingon ka daghan pa sa niining mga butanga. Apan ang gikinahanglan nato sa karon, aron mamahimong espirituwal, mao’y mga tawong magapaubos sa ilang mga kaugalingon sa atubangan sa Dios, kung wala man sila ni usa ka sentimo, ug magaampo hangtud nga kanang espiritu sa sulod kanila matagbaw gayud sa kaayo sa Dios, ug nga usa ka rebaybal ang nagakahitabo diha sa sulod sa ilang kasingkasing, nga nagabag-o sa ilang mga pamatasan ug sa kahimtang nga gikapuy-an nila.

²² Mahimong walay imo dinha nga masul-ob nga usa ka pares sa sapatos diha sa imong mga tiil, mahimong nagkagidlay ka, apan may kung unsa nga butang sulod sa imong kasingkasing nga nagakanta og mga alawiton nga iya sa Dios. Mas gustohon ko pang magkaaduna niini kay sa tanan nga kuwarta sa kalibutan.

²³ Busa dili ka makaingon nga ang natural nga mga butang kanunay mao ang timailhan sa panalangin sa Dios. Gisulti kana ni David sa Dios kaniadto, nga nakita niya ang mga dautan nga nagakatag sa iyang. . . sama sa usa ka kahoy nga lunhaw dinha sa iyang gituboa nga yuta. Apan gipangutana siya sa Dios, “Napamalandungan mo ba siya diha sa kaulahian?” Bisan unsa pa ka maayong mga bisti ang atong ginasul-ob, bisan unsa pa ka daghan ang kinahanglan natong kaanon, dili ang mga ingon niana ang mopaingon sa Presensiya sa Dios. Kining lawas nga atong ginapuy-an, mawala gayud, bisan kon giunsa pa kini pag-atiman. Apan ang kalag kini nga anaa sulod sa tawo; ang kahintang kini sa espiritu ang mao’y mopaingon sa Presensiya sa buhi nga Dios.

²⁴ Apan ginabalewala lang nato ang maong mga butang. Nagahunahuna kita nga tungod lamang nga usa kita ka nasud. . . Mao usab si Ahab ug ang tibuok nga Israel, niadtong adlaw, gibalewala lang ang mga butang, nga ang tanan okey lang. Gipaningkamotan sa ilang mga pari ug mga magwawali nga isulti kanila, “Okey lang ang tanan. Maayo man ang tanan.” Apan adunay usa sa ila kaniadto, misinggit siya batok sa maong sayup nga butang, tungod kay nahibalo kining mao nga tawo nga dili mahimong matagbaw ang usa ka balaan nga Dios sa moderno nga mga urog sa usa ka dili-balaan nga relihiyon.

²⁵ Mao usab ang Dios sa Langit nga nagpabilin nga mao ra sa gihapon karon. Sa tanan natong mga pagpanglimbasug ug sa dinagkung mga butang nga atong ginapaninguhaan nga buhaton, dili gayud mahimuot ang Dios gawas sa usa ka kinabuhi nga bug-os gibalaan sa atubangan Niya.

²⁶ Mangtukod man kita og mga eskwelahan, ug mga alampoanan, ug mga tabernakulo. Magkaaduna man kita og mga organisasyon. Maghimo man kita og dagkung mga butang, apan ang Dios dili sa gihapon malipay hangtud ang kalag sa tawo mabalaan usá diha sa altar sa Dios, hinalad alang sa mga buluhaton nga iya sa Dios. Ug wala ka na gyu’y makita nga ingon niana.

²⁷ Makita mo nga luya na ang atong mga panagtigum alang sa pag-ampo, mga usa lang ka minuto sa pag-ampo, mohigda na dayon. Makita nato nga nagakahitabo kana mga usa o duha ka higayon matag adlaw. Ingon nga, kitang tanan ginabuhat man ang ingon niana. Ang atong nasud, sa moralidad, nagakahugno na. Nagkaaduna na kita og mga Billy Graham ug mga Oral Robert sa kung asa na lang. Apan hangtud nga moabot ang pagkauhaw diha sa kasingkasing sa Amerika, aron dalhon kini pabalik ngadto sa usa ka buhi nga Dios pag-usab, ngadto sa usa ka buhi nga kasinatian, ngadto sa usa ka matunhayon nga pagtoo diha sa buhi nga Dios. Ginapakapoy lang nato ang atong mga utokan, sama sa ginaingon nila, sa paghinuktok.

²⁸ Mahimong manglakaw kita nga pinalabaw ang atong mga dughan, nga pinatindog ang atong mga kuwelyo, ug molakaw dinha sa dalan, ug naninguhang tawgon ingon nga “Doktor” o “Reverend.” Mahimong ginapastoran nato ang pinakadakung mga simbahan nga ania sa kayutaan, ug mahimong pagkarelihiyoso gayud nato sa ingon nga mahimo nato, nga walay tawong makatudlo og sayup sa atong kinabuhi. Apan hangtud kanang kalag nga anaa sa sulod kanato nagadilaab alang sa Dios, hangtud nga aduna og butang dinha, nga nagapangandoy Kaniya! “Ingon nga ang lagsaw nangandoy sa pagpangita sa tubig sa kasapaan, mao usab ang akong kalag nangandoy sa pagpangita Kanimo, Oh Dios.” Hangtud nga maabot usá nato kana nga matang sa kasinatian!

²⁹ Mao nga, ang komunismo, ug uban pa, magauswag pa sama sa ginahimo nila sa karon, ug ang tanan nga mga pagpamiyembro nga mahimo nato dili gayud makapahunong niini. Gisulti na daan nga moabot kini. Apan ginatawag na sa Dios ang Iyang Iglesia.

³⁰ Kung unsa nga kining gamay’ng babaye siguradong kapareho gayud nga matang ni Elias! Tungod kay, kasagaran nagapakita ang imong mga panglihok kung unsa gayud ikaw. Ug, usab, siya ang gipili aron mag-atiman sa propeta sa Dios. Hinumdumi, usa siya ka Gentil, dili usa ka Judio.

³¹ Ug nikaging na kaniadto ang yuta. Ug walay pagduhaduha nga kining gamay’ng babaye, ingon nga mao nga kalibre, nga mao’y tipo sa usa ka magtotoo. . . Kay makita nato nga wala unta siya gitawag sa Dios, kung dili pa siya usa ka takus nga mag-atiman sa propeta sa Dios. Kay wala gayud Niya unta gipadala ang Iyang propeta ngadto sa usa ka balay nga dili takus.

³² Dili niya kadto pagpili. Pagpili kadto sa Dios. Dili ang maong babaye ang nagsugo kaniya. Ang Dios ang nagsugo kaniya. Gipapahimutang siya kaniadto duol sa usa ka sapa. Ginadalhan siya sa mga uwak og pagkaon. Apan sugo kadto sa Dios sa usa ka butang nga mahitabo. Ug siguradong miadto ang Dios sa usa ka magtotoo nga ang kinaiya kapareho ni Elias.

³³ Usa siya ka balo nga babaye. Ug nahibalo na kita kung unsa ang iyang, ingon nga usa ka balong babaye, ang giagihan niya, nga patay na ang iyang bana ug aduna pa siya’y padakuon nga anak nga batang lalaki.

³⁴ Ug sa mga kayutaan didto, nagasalig lang sila sa ilang mga pananum. Wala sila kaniadto og mga proyekto sama nga aduna kita sa karon, ug—ug mga pabrika sa mga butang pang-depensa. Nagsalig lang sila sa ilang mga pananum. Ug tungod sa kadautan sa mga tawo, ug paghugno sa ilang mga moralidad, ang mao’y naghatud og hulaw sa ilang yuta, ania sila nga nangagutman ug himalatyon na.

³⁵ Ug dayon mahibaloan nato nga walay pagduda nagaampo ang babayeng balo kaniadto sa matag gabii, tibuok gabii, sa diha nga sugod niyang makita nga ang harina sa tadyaw nagakaubos na, nagakaubos, nagakaubos na. Ug siguradong miabot na kini sa punto hangtud nga wala na ni usa ka tasa nga harina ang anaa sa sulod sa maong tadyaw. Aduna siya og usa na lang ka kumkom niini. Anaa na mismo sa ganghaan nagaabot ang kamatayon, sa iya nang pultahan. Tungod kay wala na’y paagi nga makakuha pa og dugang niini. Mamatay na kaniadto sa gutom ang tibuok nasud.

³⁶ Ug, ang lana, usa na lang gyud ka kutsara ang nahibilin diha sa gamay nga sudlanan niini. Ingon niana na lang gyud ka gamay nga lana ug ingon na lang ka gamay nga harina ang anaa didto tali kaniya ug sa kamatayon. Siguradong nagmatinuuron pa gyud siya’g samot diha sa iyang mga pag-ampo. Tugoti ninyong moabot kana sa inyong panimalay, mamahimo kitang magmatinuuron pa og samot kay sa kung unsa kita ning buntaga, pagnakahibalo na kita nga anaa na dinha sa pultahan ang kamatayon.

³⁷ Ug nagatoo ako, nga tingali, mahunahuna nato, siguro, ang ingon niini, nga nag-ampo siya sa tibuok gabii, kay usa pa ka adlaw mahimong mao na ang katapusan. Makita niya ang luspada na nga ngabil sa iyang gamay nga batang lalaki nga mga tulo o upat ka tuig ang panuigon. Ug makita niya ang mismo niyang mga bukog nga nagakakupus na, ingon nga nagakahilis na ang unod gikan niini. Ug siguradong usa kadto ka makalililang nga butang, sa diha nga kining inahan, makita kining mga butanga nga nagakahitabo. Ug, sa gihapon, nakataas ang mga kamot niya atubangan sa Dios, nga nagaampo adlaw ug gabii, “Karon usa na lang ka kumkom sa harina ang nahibilin kanamo ug usa na lang ka kutsara sa lana.”

³⁸ Kabalo mo, talagsaon kini nga butang. Hinaut nga ipatuhop gayud kini sa Dios ngadto sa matag usa kaninyo, kung dili na ninyo ako madungog pa nga magwali pag-usab. Mamahimo unta kini nga usa ka mensahe. Pagkatalagsaon kini, talagsaon kaayo, nga ang Dios usahay nagahimo og mga butang sa ingon nianang paagi.

³⁹ Kabalo mo, paggikumpisal na nato ang atong mga kasal-anan ug natuman na nato ang tanang mga kinahanglanon nga ginapangayo sa Dios...Nanagtoo kita sa Dios. Adunay mga kinahanglanon nga kinahanglan tumanon, ug sumala kini sa Iyang kabubut-on. Ug gikumpisal na nato ang atong mga kasal-anan, ug gihimo na nato nga ang tanan nga mga nahimo natong mga kasaypanan, mahitul-id, gibuhat na ang tanan-tanan nga nahibaloan natong angay buhaton. Ang tanang mga kinahanglanon nga gihimo sa Dios, o gipangayo, ato nang gituman kana nga kinahanglanon, ug bisan pa niana nagpabilin Siya nga hilum. Basta ayaw Niya lang kita tubagon.

⁴⁰ Sigurado ako nga nagapakigsulti ako sa mga tawo, ning buntaga, nga miabot na nianang puntoha. Naagihan ko na kana, sa makadaghang higayon, ako mismo. Sa dihang gibalikan ko ug gisusi balik ang akong kinabuhi ug gipangbaliskad ang matag bato, ug nakaplagan ko nga nakabuhat ako'g sayup nga butang, ikumpisal ko kadto ug moingon, "Ginoong Dios, pagatul-iron ko kini," ug buhaton ko kadto. Dayon mobalik pag-usab ug moingon, "Karon, Ginoo, Ikaw ang Dios; Tubagon Mo ako. Siguradong natuman ko na ang matag hangyo nga gikinahanglan Mo kanako nga pagabuhaton. Ang matag gikinahanglan Mo, ako nang gihimo kini." Ug sa gihapon dili Siya molihok, daw sa nagpabilin lang nga hilum, dinha mo kinahanglan siguradohon nga Siya Dios. Ayaw'g kaluya. Ang bugtong butang lang mao, nga, sulod sa imong kasingkasing, nga kinahanglan sigurado ka sa Dios.

⁴¹ Ang akong teksto. Kinahanglan sigurado ka, usá, sa dili ka pa mohimo og unsa man nga butang. Kinahanglan sigurado ka, diha sa imong kasingkasing, nga ang Dios kini. Ug sa diha nga natuman mo na ang tanan nga Iyang giingon, kung ingon-ana nakasigurado ka nga Siya Dios, dinha na nagapamuhat ang pagtoo, dinha mismo. Nagapabilin ang pagtoo nga dili matarug, kay nasayod kini nga Siya mao gayud.

⁴² Ug natuman mo na ang tanang gikinahanglan. Nagatoo ka nga Siya mao gayud, ug nagapabilin ang pagtoo nga dili matarug. Oh, dalaygon ang Iyang Ngalan! Dili matay-og ang maong pagtoo, kay nakasigurado kini nga kini ang Dios gayud, ug ang magabalus sa kadtong mga nagapangita Kaniya.

⁴³ Hinaut nga motuhop gayud kini dinha sa kahiladman ug nga dili gayud mawala kaninyo, Branham Tabernacle. Kung natuman na ninyo ang mga gikinahanglan sa Dios, ug sa sulod sa inyong kasingkasing nagatoo kamo nga Siya mao gayud, ginatestingan lang sa Dios ang inyong pagtoo, kay gusto Niyang buhaton kana. Kung imo nang gikumpisal ang imong kasal-anan ug imo nang natuman ang matag kinahanglanon nga gipangayo sa Dios, ug sa gihapon nagapadayon Siya nga hilum lang, hinumdumi, nagaingon ang pagtoo nga Siya mao gayud. Kung ingon-ana manghawid diha niini ang pagtoo, wala man nahibalo kung bahin ba sa unsa kini tanan, apan nahibalo ang pagtoo nga Siya Dios, ug nakasigurado kini nga Siya mao gayud.

⁴⁴ Kung ingon-ana, hinumdumi, kung Siya Dios gayud, siguradong matuod ang Iyang mga Pulong. Ug kung gipangayo Niya kanimo nga tumanon kini nga mga kinahanglanon, ug gibuhat mo, obligado Siya nga tumanon ang Iyang Pulong. Ayaw pag-atras, ug mag-ingon, "Bueno, wala man gud ko naayo. Akong. . ." Oh, ikaw nga kabus, mahuyang ang pagtoo. Ayaw'g toohi kana. Kung naikumpisal na ang tanan, ug nahipagawas na ang tanan, ug natuman mo na ang gikinahanglan sa Dios, manghawid na mismo dinha ang pagtoo. Wala na'y makapatarug

niini. Siya gayu'y Dios, ug sigurado gayud ka. "Kadtong nagahulat sa Ginoo magabag-o sa ilang kusog; sila manlupad pinaagi sa mga pako ingon sa mga agila. Sila manalagan ug dili makapuyan; kung sila manlakaw, dili sila mangaluya."

⁴⁵ Hulata lang, pagnatuman mo na ang Iyang gikinahanglan. Nagahatud kana sa imong pagtoo ngadto sa usa ka pagpakigsangka. Kung imo nang natuman... Nabuhat na ang mga gikinahanglan sa Dios, o natuman na, ug imo nang bug-os gipamalandungan kini, ug imo nang nabuhat ang tanan nga gipangayo sa Dios kanimo nga buhaton, kung ingon-ana mosandig na mismo dinha ang imong pagtoo, nga Siya mao gayud. Kinahanglan sigurado ka sa Dios.

⁴⁶ Kabalo mo, gusto gayud Niya nga sulayan kita. Gusto Niya makita ang reaksyon sa imong pagtoo. Nakahibalo ba mo niana? Gusto sa Dios nga makita kung unsa ka maglihok. Pagmoingon ka, "Oh Ginoo, nagatoo ako Kanimo. Ikaw ang akong Manluluwas. Nagatoo ako nga Ikaw mao ang Mag-aayo. Nagatoo ako nga Ikaw Mao Ang nagahatag sa Balaang Espiritu. Ug ang mga butang nga ginapangayo ko, Ikaw ang Dios Nga nagahatag niana." Ug dayon kung imong ikumpisal ang imong mga kasal-anan ug magsaad sa Dios kung unsay imong pagabuhaton kung pagaayohon ka Niya, ug dayon tungod nga wala kini mahitabo, modagan ka sa kung asa man nga sama sa usa ka talawan. Dili magamit sa Dios ang mga ingon niana. Walay paagi alang Kaniya nga gamiton ka. Wala na'y paagi alang Kaniya nga matubag ka, tungod kay nagatubag lang Siya tungod sa pagtoo. Dayon, sa hinanali na lang, molakaw ka, ug dili na Siya makatubag. Apan ang tinuod, matuod nga pagtoo nagapabilin dinha, nga nakasigurado gayud sa Dios. Kinahanglan sigurado ka nga Siya mao gayud.

⁴⁷ Ug kung gihangyo sa Dios nga buhaton kini nga butang, nga ikumpisal ang imong kasal-anan, ug uban pa, ug gibuhat mo na kini, ginaingon sa pagtoo nga Siya mao gayud, sigurado gayud nga mahitabo kini. Kinahanglan nga mahatagan ka sa imong gihangyo. Oh, ako—nagalaum ako nga dili ninyo kini mapalagpas. Kung nakasigurado kamo sa Dios, sigurado ang Dios sa Iyang Pulong. Nagahulat lamang Siya nga sulayan kamo.

Gihimo na Niya kini sa makadaghang higayon. Balikan nato ang usa o duha ka nahitabo.

⁴⁸ Hunahunaon nato ang mahitungod sa mga anak nga Hebreohanon kaniadto. Dili sila angay moyukbo sa usa ka diosdios. May salig ang Dios kanila. Ug sa dihang nadungog nila nga kinahanglan silang moadto sa hudno nga nagadilaab sa kalayo, miingon sila, "Ang among Dios makahimo sa pagluwas kanamo gikan niini nga hudno. Apan kung ugaling dili Niya buhaton kini, dili gayud kami magayukbo ngadto sa bisan

unsa man nga imong mga diosdios.” Kita n’yo, piho sila ug nakasigurado gayud sa Dios.

⁴⁹ Nakaila sila nga Siya mao si Jehova. Nasayod sila nga nagatubag Siya og mga pag-ampo. Apan kung mamuhat man Siya para sa ilang kaso, o dili man, sigurado nga alang kini sa kaayohan. Busa ila lang gisulti ang ilang mga pagpamahayag, gikumpisal ang ilang mga kasal-anan, ug nanglakaw na paingon sa kamatayon.

⁵⁰ Niadtong paingon na sila sa maong nagakalayo nga hudno, nasayod nga nakasigurado gyud sila, nga, kung tugotan man sa Dios nga masunog sila, Iya silang pagabangonon pag-usab, diha sa pagkabanhaw na. Nakasigurado gayud sila sa Dios, tungod kay nakahibalo sila nga buhaton sa Dios ang tanan alang sa ilang kaayohan. Ug pagnakasigurado gayud kita sa Dios, nakahibalo kita nga buhaton sa Dios ang tanan alang sa atong kaayohan.

⁵¹ Busa, mihimo sila og usa ka pamahayag. Nakasigurado gyud sila, ug milakaw sila pasulod mismo sa maong hudno nga nagadilaab sa kalayo. Ug gipasagdan sila sa Dios nga mopaingon didto; atua Siya, nga nagalantaw kanila. Gusto Niyang makita ang ilang reaksyon.

⁵² Sa diha, ang hari miingon, “Nangyukbo ba mo niadtong mibudyong ang trumpeta?”

Miingon sila, “Wala. Wala kami nangyukbo.” Kana ang inyong pagtoo, nga nanghawid og ayo.

“Bueno, kung ingon-ana, kung wala kamo nangyukbo, nakahibalo na kamo sa akong balaod.”

“Oo, nahibalo kami sa imong balaod.”

“Ang akong balaod mao nga painiton sa pito ka pilo ang hudno nga labaw pa sa naandan niini sukad, ug ipanglabay ko kamo didto. Mangyukbo na ba kamo karon?”

“Dili. Dili kami mangyukbo.” Ingon niana ang ilang pagtoo.

⁵³ Ingon sa Dios, “Bueno, tan-awon Ko kung unsa gayud ang ilang buhaton bahin niini. Tan-awon Ko kung unsa ang reaksyon sa ilang pagtoo.”

⁵⁴ Busa miingon siya, “Panghigti ang ilang mga kamot, ug panghigti ang ilang mga tiil, ug pangdalha na sila ngadto sa hudno.” Ug nanglakaw na sila paingon niadtong hudno, nga anaa na ang kalayo sa ilang atubangan. Atua lang sa gihapon ang Dios, nga nagalantaw niini. Apan nakasigurado gyud sila nga Siya Dios. Ila nang gihimo ang ilang pagpangumpisal. Gipangtul-id na nila ang tanan, sa nahibaloan nila. Nakasigurado gyud sila nga Siya Dios.

⁵⁵ Busa milakaw sila mismo paingon niadtong nagadilaab nga hudno. Didto mismo sa kinaulahi-ang takna, atua Siya nagaabot gikan sa kalangitan, diha sa usa ka carro nga hangin, nga

gipaypay palayo ang mainit nga hangin gikan kanila, samtang nga gilipay Niya sila ug nagpakig-estorya kanila.

⁵⁶ Ginatugotan sa Dios nga moabot ang inyong pagtoo ngadto sa punto kon diin magkaaduna kini og reaksyon.

⁵⁷ Anaa si Job, diha sa Daang Tugon, sa dihang si Satanas, ang magsusumbong batok kanato, gisumbong siya ingon nga usa ka makasasala sa tago lang. Apan nasayod si Job nga wala siya nakasala. Nasayod siya nga iya nang gikumpisal ang tanan nga iyang nabuhat, ug naghalad didto og usa ka halad-nga-sinunog. Kadto ang ginapangayo sa Dios. Kadto lang gyud ang gipangayo sa Dios, mao kadtong halad-nga-sinunog ug ang usa ka pagkumpisal. Ug gibuhat ni Job kadtong mga butanga.

⁵⁸ Ug miingon si Satanas, “Pangkuhaon ko ang iyang mga kamelyo, kay usa siya ka adunahan nga tawo. Pangkuhaon ko ang iyang mga karnero.” Ug sa ulahi gipangkuha niini ang iyang mga anak, ang mga pinakaduol sa iyang kasingkasing.

⁵⁹ Sa gihapon, nagpadayon si Job nga lig-on, kay nakaila siya nianang Dios, bueno, nakasigurado siya nga Siya Dios, kay nakapakigsulti na siya ngadto Kaniya, ug napangtuman na niya ang Iyang mga gipangayo. Iyang gibalikan ug nakaplagaan nga, “Gihimo ko na ang matag halad nga sinunog. Miingon ako sa akong kasingkasing, ‘Tingali sa diha nga ang akong mga anak nga lalaki nagpahigayon og usa—usa ka kapiyestahan, ug nga mitambong ang anak kong mga babaye, basin nakasala sila sa tago lang diha sa ilang kasingkasing, busa magahalad ako og usa ka halad-nga-sinunog nga gikan kanila ug ikumpisal ang ilang kasaypanan.’”

⁶⁰ Oh Dios! Pag-ginatuman sa usa ka tawo kung unsay giingon sa Dios nga buhaton, nakasigurado gayud siya nga Siya Dios, gikinahanglan Niya kining tubagon. Ginatawag Siya sa pagtoo ngadto sa maong esena, sa matag higayon.

⁶¹ Pagnabuhat mo na kung unsay nahibaloan mo nga husto, pagnatuman mo na ang Iyang mga gikinahanglan, pagnakumpisal mo na ug nahitul-id na, ug gipang-uli na ang mga angay ipang-uli, ug gipahimutang na kini sa atubangan sa Dios. Dili ko igsapayan kung unsa man Siya kahilum, sa gihapon Siya Dios, nga nagahulat nga gamiton mo kana nga pagtoo dinha. Nahimo mo na ang imong mga gipanghimo, karon gusto Niyang makita ang imong pagtoo pinaagi sa imong mga buhat. Gusto Niyang makita kung unsay imong buhaton.

⁶² Kung ikaw nadihogan na og lana ug naiampo na, nagahulat ang Dios nga makita kung unsay imong toohan bahin niini. Dili nga moduol sa sunod nga Dominggo, ug moduol na usab pagkasunod nga adlaw, ug sa sunod na usab nga may mag-aayo nga moabot sa siyudad. Gusto Niyang makita ang imong reaksyon sa imong pagtoo. Dili nga mobalik, pagkasunod nga adlaw, ug moingon, “Dili gayud maayo ang akong gibati, wala

man siguro ako naayo.” Dili ka pa takus alang sa prayer line, sa sugod pa lang. Dili pa. Dili pa. Dili ka pa andam, sa gihapon. Wala mo toohi nga Siya Dios. Wala ko . . .

⁶³ Mahimong moingon ka, “Igsoong Branham, dili ko uyon kanimo.” Ginapamatud-an sa kaugalingon mong panglihok kung unsa gayud ka. “Pinaagi sa ilang mga bunga maila ninyo sila.” Kung nagaingon ang usa ka tawo nga siya Cristohanon; ug nagainum siya sa gihapon, ug nagapanigarilyo, ug nagasugal, ug nagaestorya og mahugaw nga mga panistis, ug nagaingon, “May bahin lang sa Biblia ang husto, ug ang uban nga bahin dili.” Mahimong nagawali siya sa Maayong Balita, ug ginapanghimakak ang usa ka bahin sa Biblia. Usa siya ka makasasala sa gihapon. Dili pa siya matarung, bisan unsaon.

⁶⁴ Apan sa diha nga dayag mong ginapahayag nga ang Dios ang mao sa gihapon nga Dios, ug ang imong kinabuhi gitugyan mo na sa Iyang mga kamot, nga mamahimong, “Ginoo, ako’y yutang kolonon; Ikaw mao ang Magkokolon,” kung ingon-ana pangayoa ang gusto mo. Dili gayud matarug ang pagtoo. Magabarug kini mismo dinha.

⁶⁵ Bisan pa nga ang mga sirkumstanya daw sa nagapangabot na lang sa wala ug tuo, apan dili gayud matarug kana nga pagtoo, tungod kay sigurado gayud ka nga Siya Dios. Ug kung Siya Dios, Iyang ginatuman ang Iyang saad. Dili Siya mahimong mosaad ug nga dili kini tumanon. Kung Siya Dios, kinahanglan Niyang tumanon ang Iyang saad. Oh, gusto ko gayud kana. Kinahanglan Siyang magpabilin diha niini.

⁶⁶ Gihimo ni Job ang iyang mga paghalad; gibuhat niya ang tanan. Nasayod siya nga husto siya. Ug ania miduaw ang mga miyembro sa iglesia, pipila ka mga iglesia sa uban nga mga denominasyon, miingon, “Job, maayo pa nga ikumpisal mo na nga usa ikaw ka makasasala, kay wala ka unta gisilotan sa Dios og ingon niini kung dili ka usa ka makasasala.”

⁶⁷ Apan miingon si Job, “Nahimo ko na ang akong mga pagpangumpisal. Ako nang gihalad ang maong halad-nga-sinunog didto sa atubangan sa Dios, ug dili ako usa ka makasasala.” Nasayod siya kung asa siya nagabarug. Dayon ang tanan nagpadayon, basta nga nagpadayon lang ug nagpadayon ug nagpadayon, sa ingon gayud nga malisud kaayo, sa paninguha nga paluyahon si Job, ug aron dalhon si Job sa punto nga isalikway niya ang Dios ug isalikway kadtong halad-nga-sinunog. Sa mismong takna nga may buhaton ka pa sa kung unsa man ang imo nang gipahayag, ginapakita niini ang imong kahuyang, ang imong pagduhaduha sa Dios. Nagahangyo ka sa Dios og unsa man nga butang, ug molakaw nga ginaduhaduhan mo kini, kung ingon-ana usa ikaw ka maduhaduhan ug dili nga usa ka magtotoo.

68 Nasayod si Job kung asa siya nagabarug, ug malig-on siya nga mibarug sa niana nga pundasyon.

69 Dili ikatingala nga miingon si Perronet, diha sa takna nga hapit na siya mamatay:

Kang Cristo, ang malig-on nga Bato, ako
nagatindog;
Ang tanang uban pa nga yuta mao'y balas nga
nagakaunlod.

70 Sa nianang malig-on nga bato sa pamahayag ni Job, mibiya bisan ang pinalangga niyang asawa. Niadtong nawala na ang maayo niyang panglawas, ug gilukopan siya og mga hubag, ug gikagis niya ang tibuok niyang lawas ug gipanghimaraut ang adlaw nga iyang gikatawohan. Miingon, “Hinout nga dili na mosidlak ang adlaw! Hinout nga magapabilin nga wala ang bulan sa gabii.”

 Miingon ang iyang asawa, “Job, pagkamakalooloy nimo. Nganong dili mo man tunglohon ang Dios ug mamatay na?”

71 Miingon siya, “Nagasulti ka nga sama sa mga babayeng buangbuang.” Sigurado gayud siya nga adunay usa ka Dios, ug iyang natuman ang maong mga gikinahanglan. Oh, nagbati ko og pagkarelihiyoso. Nasayod siya nga iyang natuman ang mga gipangayo sa Dios, ug mao na kadto. Ginasulayan lang sa Dios ang iyang pagtoo. Pagasulayan Niya ang imoha usab. Pagasulayan Niya ang sa ako usab.

72 Apan sa diha nga natuman na nato ang Iyang mga gikinahanglan, “Maghinulsol ang tagsatagsa kaninyo ug magpabautismo sa Ngalan ni Jesus Cristo alang sa kapasayloan sa inyong mga sala, ug madawat ninyo ang gasa nga Espiritu Santo,” kana ang Iyang saad. “Kinsa man kaninyo ang may sakit, ipatawag ang mga anciano sa iglesia. Dihogan nila sila og lana, ug igaampo. Ang pag-ampo nga inubana’g pagtoo magayo sa masakiton, ug pagabangonon sila sa Dios.” Mao na kana. “Magsinugiray sa inyong mga sala, sa usa’g usa, ug mag-ampo ang usa alang sa usa.” Natuman n’yo na ang mga gikinahanglan sa Dios.

73 “Ug kanila nga nagatoo maganunot kining maong mga ilhanan. Sa Akong Ngalan pagahinginlan nila ang mga yawa; magasulti sila og mga bag-ong sinultihan; kung makakupot sila’g mga bitin o makainom man og mga butang nga makahilo, dili kini makadaut kanila; kon pandungan nila sa ilang mga kamot ang mga masakiton, mangaayo ang mga niini.” Mao na kana.

74 Kinahanglan sigurado kamo sa Dios. Siguradohon ninyo, nga sulod sa inyong kasingkasing, nga nagatoo kamo nga ang Pulong kana sa Dios. Ingon niana si Job kaniadto.

Miingon ang iyang asawa, “Nganong dili mo na tunglohon ang Dios ug mamatay? Aba, sigisigi ka nang nagkasamut pagkadaut.”

⁷⁵ Daw sa unsa ka gusto ni Satanas nga ibato kana kaninyo. “Aba, mao ra man ka gihapon niadtong gidihogan ka og lana. Wala man ka naayo sukad miampo kadtong mga magwawali alang kanimo. Kadto nga mga magwawali dili husto, sa sugod pa lang.” Dili importante kung unsa man ang mahitungod niadtong magwawali. Ang pagtoo mo kini ngadto sa buhi nga Dios, ang mao’y importante. Dili nga kung unsa ang magwawali; kini mao kung unsa ang Dios. Dili ang magwawali ang nagsaad; ang Dios ang nagsaad. Dili kini nag-agad sa magwawali; nag-agad kini sa Dios, ug sa imong pagtoo sa pagsalig nga ang Dios kana. Busa kinahanglan sigurado ka sa Dios. Kinahanglan sigurado ka nga ang Dios kini, ug ang Pulong kana sa Dios. Ug ang Dios anaa sa Iyang Pulong.

⁷⁶ Ug miingon si Job, “Nagasulti ka nga sama sa usa ka babayeng buangbuang.” Miingon, “Ang Ginoo ang mihatag, ug ang Ginoo ang mikuha; dalaygon ang Ngalan sa Ginoo.” Sigurado gayud siya nga adunay Dios.

⁷⁷ Ug sa napagawas na niya kadto sa iyang baba, misugod nga midahunog ang mga dalogdog ug misugod pagpangidlat. Miabot ang Dios diha sa esena. Kanunay kining nagatawag Kaniya ngadto sa esena. Dugay Siyang nagpabilin kaniadto nga hilum.

⁷⁸ Mao kana ang Iyang ginabuhat. Tan-awa kining pundok sa mga pa-impierno nga mga Amerikano, nagasimba nga mga tigpakaaron-ingnon. Wala ako nasuko. Apan nagapasuko ang kasal-anan ngadto ni kinsa man nga matarung diha sa Dios. Dili nga suko ako sa nasud, dili nga suko ako sa mga tawo, apan suko ako sa Yawa nga nagpabuta sa mga tawo sa niining mga butanga.

⁷⁹ Kining buta nga mga pastor ug mga magwawali ginapalusot sila pinaagi sa kung unsa nga matang sa teolohiya nga hinimosa-tawo. Kinahanglan kamong matawo pag-usab. Ug ginatuman sa Dios ang Iyang Pulong. Ang makita siya samtang nga ginalimbongan niya sila. Kinahanglan nga siguradohon mo gayud nga may Dios. “Nga nagabaton sa dagway sa pagkadiosnon, ug nagapanghimakak sa Gahum niini.”

⁸⁰ Kining makalalooy, gamay nga babaye, nasayod siya nga Siya Dios. Sa diha nga ang sulod sa tadyaw nagakaubos, nagakaubos, nagakaubos, nagakaubos na, nga nagakasamut ug nagakasamut ang mga sirkumstansya, sa sigisigi. Apan gitugotan sa Dios nga maingon niana kadto. Gusto Niya gayud nga buhaton kana. Gusto Niyang ibutang ang inyong pagtoo diha sa pagsulay, aron tan-awon kon unsaon ninyo paglihok tungod niini, pahanugotan nga madihogan og lana kamo ug maiampo, dayon himoon kamong nagsamut pa ka masakiton.

Miingon, “Sige, Satanas, sulayi siya. Nasayod Ako nga nagatoo siya Kanako.” Dalaygon ang Dios sa walay katapusan! Oh, sus! [Ginapakpak ni Igsoong Branhan ang iyang mga kamot sa makaduhang higayon—Ed.] “Sulayi siya karon. Nasayod Ako nga nagasalig gayud siya sa Akong Pulong.” Makasulti ba Siya niana bahin kanimo?

⁸¹ Ingon niana ang gisulti Niya bahin kang Job. Miingon, “Buhata kaniya ang unsa man nga gusto mo, apan ayaw lang kuhaa ang iyang kinabuhi, kay nasayod Ako nga gihigugma niya Ako. Naghalad na siya og halad-nga-sinunog. Gihimo na niya ang gipangayo Ko. Gibuhat na niya kung unsay Akong gisulti kaniya nga buhaton, ug nagatoo siya niini. Karon ipaligid mo pa siya sa mga baga kon gusto mo.” Gikuha sa yawa ang tanan-tanan na gikan kaniya. Gidoble kini sa Dios sa diha nga gihatag na Niya kini balik kaniya. Sigurado, buhaton gayud Niya.

⁸² Ginasulayan Niya ang atong pagtoo, aron tan-awon kung tinuod ba gayud nga nagatoo kita nga Siya Dios.

⁸³ Kadtong maong babaye, walay pagduhaduha, miingon, “Nag-ampo ako. Nag-ampo ako. Nasayod ako nga ako usa ka dili-takus nga Gentil.”

⁸⁴ Hinumdumi, naghisgot si Jesus mahitungod kaniya diha sa Biblia. Miingon Siya, “Dili ba nga daghang mga babayeng balo sa mga adlaw ni Elias? Apan gipadala lamang siya ngadto sa usa ra, ug usa kini ka Gentil.”

⁸⁵ “Oh,” miingon siya, “Nagaampo ako.” Tingali, sa nakita na niya kadtong pang-katapusan na nga gamay’ng tinapay, nakasulod na sa ganghaan ang kamatayon ug pasulod na sa pultahan. Usa na lang ka ingkit, tig-usa sila, ug siya ug ang anak niyang lalaki mamatay na. Makita ko siya, nga tibuok gabii, nagaampo, nga nagahaguros kadtong mainit nga hangin, ug nikaging na ang yuta, ug naghilaka na ang mga tawo ug nagasiniyagit diha sa kadalanan. Naglakaw-lakaw siya, sulod sa tibuok balay. Mitan-aw siya sa gamay niyang anak nga lalaki. Gitan-aw ang gamay niining mga pajama; nagabok na kini, ug nanggawas na ang mga tiil niini. Gitan-aw ang mismo niyang mga kamot, nangunot na. Pabalik-balik siya nga naglakaw-lakaw, apan miingon siya, “Nasayod ako nga Siya Dios. Gihimo ko na ang tanan ko nga pagpangumpisal. Gibuhat ko na ang tanan-tanan nga gikinahanglan Niya. Nagahangyo ako alang sa among mga kinabuhi, alang sa Iyang kahimayaan.” Nakita siya sa Dios.

⁸⁶ Ang uban kanila atua sa gawas ug nagpahigayon og dagkung mga sayawan sa kung asa man, nga gipapatahum ang ilang mga kaugalingon, adunay mga modernong pasundayag sa telebisyon o kung unsa man, kung unsa na lang ang ginapamuhat uban sa kalibutan. Apan kadto nga babaye nag-inusara uban sa Dios.

87 Mibanagbanag na. Ingon niya, “Mihilak tibuok gabii ang makalolooy ko nga anak nga nangayo sa kung unsay makaon. Unsa man ang buhaton ko niining usa na lang ka kumkom nga harina?”

88 Kabalo mo, kadto nga harina mao si Cristo. Ang si kinsa man nga magtotoon sa Biblia nasayod nga si Cristo mao ang halad-nga-Harina. Ug kana nga halad-nga-harina kinahanglan magaling diha sa usa ka espesyal nga galingan, usab, hangtud nga madugmok gyud ang matag lugas niini nga magkaparepareho; tungod kay si Jesus Cristo mao ang mao sa gihapon, kagahapon, karon, ug hangtud sa kahangturan. Ug ang matag magtotoo nagatoo niana ug nakasandig dinha. Alleluya! Sa imo na ang tanan mong dugay na, nga mabugnaw og pormal nga relihiyon nga gusto mo. Para kanako, nagatoo ako nga si Cristo ang mao sa gihapon kagahapon, karon, ug hangtud sa kahangturan. Magabarug ako nga magapamatuod diha sa kalibutan sa mga dili-magtotoo. Nagatoo ako sa gihapon nga Siya mao sa gihapon kagahapon, karon, ug hangtud sa kahangturan.

89 Ginagaling sa galingan ang matag tipik niini nga magkaparepareho, tungod nga Siya mao sa gihapon. Siya ang mao ra sa gihapon nga Dios kung unsa Siya kaniadto, mao Siya sa gihapon karon, ning buntaga. Kanunay Siyang mamahimong mao sa gihapon. Ingon niana ang pasabot sa maong harina.

90 Ug ang lana nagakahulogan nga mao ang Espiritu, sama sa ato nang nahibaloan sumala sa Ezequiel 4, ug uban pa. Mao kana ang hinungdan nga nagapangdihog kita og lana; ang Espiritu kini. Unsa man kini? Sumala kang San Juan 4, “Ingon niana ang ginapangita sa Amahan aron managsimba Kaniya sa Espiritu ug sa Kamatuoran.” Si Jesus mao ang Kamatuoran. Siya mao ang halad-nga-Harina, ug kining lana mao ang Espiritu. Ug ang Espiritu, nga gisagol sa Kamatuoran, siguradong aduna gyu’y maihatud. Pag-isagol mo sila, mamahimo kini nga usa ka tinapay. Oh!

91 Asa man ang inyong pagtoo? Sa diha nga ang Pulong sa Dios nawali diha sa pagkayano Niini, bisan pa diha sa Gahum Niini, nga si Jesus Cristo mao sa gihapon kagahapon, karon, ug hangtud sa kahangturan, ug ginapahayag ang Pulong ingon nga mao ang Harina, aduna ka’y Lana aron isagol diha Niini. Mahimong usa ra kini ka gamay’ng kumkom, o usa ra ka kutsara, apaan, bisan unsa pa kini, tinuod kini.

92 Karon alang sa unsa man nga giandam kini? Giandam kini alang sa krus. Giandam kini alang sa pagsakripisyo-sa-kaugalingon. Mao kana ang kinahanglan mong buhaton. Kung giwali na ang Pulong, ug gisagol mo na Kini ug ang Espiritu, pagsakripisyo-sa-kaugalingon kini nga isalikway ang matag kasakitan, nga isalikway ang matag balatian, nga isalikway

ang tanan-tanan nga supak sa Pulong sa Dios, ug magbarug diha niini.

⁹³ Ang doktor moingon *niini*, *niana*, o *uban pa*; wala kini mahimo og gamay man nga kalainan. Pagabarugan mo kini, tungod kay mao kana ang gisulti sa Dios. Miabot ang Harina. Aduna ka na'y Lana. Ipangsagol mo na Kini.

⁹⁴ Karon, madungog ko ang usa ka tingog. Bag-o pa lang mibanagbanag ang adlaw. Nakigsulti ang tingog, ug miingon, "Adto ka didto sa nataran ug mamunit ka og duha ka lugas sa kahoy." Nahimatikdan ba ninyo, miingon ang Kasulatan "duha ka lugas sa kahoy"? Ang krus. Aduna siya'y harina ug lana, apan kinahanglan nga tawgon siya, aron maglihok na karon; maglihok nga gamit kini. Unsa man kadaghan ang aduna ka, unsa man ka daghan nga Harina o Lana ang kinahanglan mo, apan kinahanglan nga maglihok ka; ang pagsakripisyo-sa-kaugalingon.

⁹⁵ Duha ka lugas sa kahoy. Niadtong karaang mga panahon wala na sila kaniadto og mas maayo pa nga paagi sa paghimo og kalayo. Pagmokuha ka og usa ka lugas sa kahoy ug ibutang kini nga pakuros ibabaw sa usa pa ka lugas sa kahoy, duslitan kini sa tunga, ginapakilab mo ang parehong duha ka tumoy niini. Ginapadaob sa mga Indiano ang ilang kalayo. Nakadaob na ako niini, sa daghang higayon, tibuok gabii. Mokuha ka lang og troso, ug kini paingon *niini*, ug ang usa paingon *niana*, ug padayon lang nga itulod kini ngadto sa kalayo samtang kini ginadaob.

⁹⁶ Kadtong lugas sa kahoy mao ang krus. "Duha ka lugas sa kahoy," ang ingon sa Biblia. Miingon ang tingog, "Adto ka didto sa nataran ug magkuha'g duha ka lugas sa kahoy." Niadtong orasa usab, ibabaw didto sa bukid, adunay midahunog nga tingog ngadto sa propeta ug miingon, "Adto ka sa siyudad. Nagsugo na Ako." Oh, sus! Pareho silang mituman. Aduna gyu'y butang nga mahitabo. Pareho silang duha nagatuman.

⁹⁷ Pag-ginawali sa magwawali ang Pulong, ug ang tawo nga nagadawat Niini og nagatoo Niini ug nagalihok basi Niini, aduna gyu'y butang nga mahitabo. Kung usa ikaw ka makakasala, siguradong maluwas ka. Kung masakiton ka, siguradong maayo ka, tungod kay gisaad kini sa Dios, kung sigurado gayud kita sa Dios.

⁹⁸ Sa ingon ka sigurado nga Siya Dios, pagatumanon gayud Niya ang Iyang Pulong. Sigurado gayud! Dayon ang sugo kaniadto mao'y, "Adto ka sa siyudad, kay gisugo Ko na ang usa ka balong babaye." Usa ka panan-awon ang miabot atubangan sa maong propeta. Ania na siya, nga nagalakaw. Wala siya kahibalo kung asa siya paingon; wala kini og unsa man nga kabilingan. Nagatuman lang siya.

⁹⁹ Wala kahibalo ang maong babaye kung asa mapahimutang ang maong mga lugas sa kahoy, apan aduna gyu'y duha ka lugas

sa kahoy sa kung asa man diha sa nataran. Migawas na siya. Miadto na siya sa nataran. Milantaw siya sa palibot, “Oh, mainit gayud kaayo!” Ang mga siyagit nga nagagikan sa siyudad, ang mga libodsuroy pag-gabii nga nagaadto didto, nagkagubot didto sa dalan, nagainum sa ilang mga bino, ug uban pa. Mitan-aw siya didto sa dalan. Wala siya’y nakita. May nakita siya og usa ka lugas sa kahoy; usa ka bahin sa krus, pagsakripisyo-sa-kaugalingon. Nakakuha siya og usa pa, usa ka lugas sa kahoy. Ug pagkapunit niya niadtong ikaduhang lugas sa kahoy. . .

¹⁰⁰ Oh, pagkamangiub tingali niadto, nga anaa na sa pultahan ang kamatayon. Siya ug ang anak niyang lalaki kinahanglan na lang mokaon niadtong diyutay nga tinapay nga hinimo sa mais ug mamatay na. Mao na lang kadto. Ug usahay, dinha sa taliwala mismo sa maong kangiub, nga madungog nato ang tingog.

¹⁰¹ Sa diha nga gipunit niya kadtong ikaduha nga lugas sa kahoy ug misugod na’g lakaw pabalik, adunay usa ka tingog nga nagagikan didto sa ganghaan, miingon, “Dad-i ako og madiyutay nga tubig sa usa ka sudlanan.”

¹⁰² Milingi siya aron sa pagtan-aw, nga daladala sa iyang kamot kining duha ka lugas sa kahoy, nga ang harina ug lana nasagol na ug andam na. Miingon siya nga naandam na niya kini, napangsagol na kini. Ingon niana kung unsa, ang Pulong ug ang Espiritu, kinahanglan nga maisagol. Ipahimutang kini diha sa krus sa pagsakripisyo-sa-kaugalingon, aron isalikway ang bisan unsa man nga supak sa kung unsay ginapangayo mo. Husto kana. “Napangsagol ko na kini, karon kuhaon ko na kining mga lugas sa kahoy.”

Ug miingon kadto nga tingog, “Dad-i ako og madiyutay nga tubig, diha sa usa ka sudlanan.”

¹⁰³ Mitan-aw siya, ug nakita niya ang usa ka lalaking nagatindog, nagsandig didto sa pikas bahin sa maong ganghaan, maniwang ang nawong, balbason, upaw na, nga nagalantaw gikan sa pikas bahin nga ganghaan, nga nagsul-ob siya og usa ka karaan na nga panit sa karnero. Mora siya og daw sa usa ka buutan nga tigulang nga lalaki.

¹⁰⁴ Miingon siya, “Bahinan ko siya sa akong tubig.” Mga Tubig sa Kinabuhi, nga andam mong ihatag kini sa kang kinsa man, nga isulti mo kang kinsa man, nga moadto ka bisan asa man. “Sa makadiyut lang, sir.” Misugod siya og lakaw, nga dala ang mga lugas sa kahoy diha sa iyang kamot.

¹⁰⁵ Ug midahunog na usab ang tingog, “Dili lang nga bahinan mo ako sa imong tubig, apan dad-i ako og usa ka buok nga tinapay diha sa imong kamot.” Tinapay sa kinabuhi; tubig sa kinabuhi! Sa kinabuhi ba kini? Dili magdugay mamatay na siya pagkahurot niana. “Dad-i ko sa imong tubig ug dad-i ko sa imong tinapay.”

106 Unsa man ang atong makita dinhi? Unsa man nga leksyon ang makita nato? “Unaha ninyo pagpangita ang Ginghamarian sa Dios, ug ang Iyang pagkamatarung; igadugang ra kaninyo ang uban pa nga mga butang.”

“Dad-i ko og madyutay nga tubig ug usa ka buok nga tinapay.”

107 Dayon miliso siya, diha sa iyang kangiub. Madungog ko siya nga nagaingon, “Sir,” daw sa ingon niini kini, “lahi ka sa mga lalaki nga nakita ko, ug mga lalaki nga nadungog ko nga nagasulti. Mora og positibo gayud ka sa imong ginasulti. Apan igoigo lang gyud ang akong harina, nga usa na lang ka kumkom, ug usa na lang ka kutsara nga lana. Ako nang giandam kini, ug pagalutoon ko na kini pinaagi niining duha ka lugas sa kahoy. Ug akong kaonon kini, ako ug ang akong anak nga lalaki, ug mamatay na. Mao na lang gyud kana ang aduna ako.”

108 Unsa ma’y madungog nato, kung ingon-ana, ang sunod? “Pero, dalha kanako ang maong gamay nga tinapay, usá.” Ang Dios, usá. Bisan unsa pa man ang ginaingon ni kinsa man, bisan unsa man nga uban pa, bisan unsa man nga ebidensya, bisan unsa pa man ka kangiub kini kon tan-awon, bisan unsa pa man kini, unaha ang Dios, usá. Ang Iyang Pulong, usá.

109 “Nag-ingon ang doktor nga dili na ako maayo.” Apan, ang Iyang Pulong, usá. “Hilabihan na ako ka makasasala. Usa ako ka bigaon. Usa ako ka sugarol. Usa ako ka palahubog.”

Ang Pulong sa Dios, usá. “Bisan unsa pa ka pula ang inyong mga sala, sila pagapution ingon sa nieve; lubos man ka mapula, sila mahimong sama sa maputing balhibo sa carnero.” Unaha usá, ang Dios.

110 “Adto na, dad-i ko og usa ka gamay nga tinapay, usá. Ang tanan nga aduna kanimo, dalha kini kanako.” Andam ka ba nga ihatag kini sa Iyang mga kamot?

111 Ang kinabuhi ko, ang tanan nga ako. Singkwenta na ka tuig ang edad ko. “Andam ka ba, William Branham, nga itugyan kini Kanako? Andam ba kamo, kamong mga bata, nga itugyan ang inyong kinabuhi Kanako? Andam ba kamo? Mahimo ba ninyo kini, mga tawong may sakit? Makasalig ba mo Kanako? Unaha ninyo Ako.”

112 “Dad-i ko og usa ka buok nga tinapay diha sa imong kamot, ug kuhai ko og madyutay nga tubig.” Mitan-aw siya kaniya. Daw sa may nagasulti kaniya nga kanang tawhana nahibalo sa kung unsa ang iyang ginasulti.

Nakaila ang Dios sa Kaugalingon Niyang mga karnero. “Ang Akong mga karnero nakaila sa Akong Tingog. Nasayod sila kung Kasulatan ba kini o dili, kung husto ba kini o dili.”

113 Miadto siya, sa pagtuman. Mao kana ang kinahanglan mong buhaton. Ug sa diha nga miadto siya, aron sundon kung unsa

ang giingon sa propeta nga buhaton, dinha dayon miabot ang dalogdog gikan sa Langit, nga ginapangandoy sa matag tawo nga madungog. Kay, may nagagawas nga usa ka dalogdog nga gikan sa tingog sa propeta, nga ginapangandoy nga madungog sa matag makasasala ug tawong masakiton, “MAO KINI ANG GINAINGON SA GINOO.”

114 Daw sa unsa nato gipangandoy nga madungog Kini! Kung unsa nga ang mga tawo manglingkod dinha sa agianan sa akong garahe, moingon, “Anhi ka niini nga pultahan. Anaa sa *ingon niini* ang akong anak nga babaye. Ang gamay ko nga anak, sus, maluya na kaayo. Isulti lang ang pulong.” Unsaon mo man pagsulti niini nga wala pa man kini diha sa imong baba? Mamahimong ikaw lang mismo ang nagasulti niini. Apan ginapangandoy nila nga madungog kanang, “MAO KINI ANG GINAINGON SA GINOO.”

115 Atua na miduol kini, didto sa koral, tungod kay mituman siya. Ug nawala ang kangiub. “MAO KINI ANG GINAINGON SA GINOO. Ang tadyaw dili na mahutdan, ni mamalhan man ang maong tibud-tibud, hangtud sa adlaw nga ang Ginoong Dios magapaulan sa ibabaw sa yuta.” Oh, daw sa unsa nga kahupayan!

116 Giluto niya ang tinapay. Gihatag niya kini sa propeta. Mibalik siya ug nagluto og pipila pa para sa iyang anak ug sa iyang kaugalingon. Ug nagkaon sila ug miinom, sa kadagaya, ibabaw sa yuta.

117 Asa man kadto gikan? Sa unsa man nga nakaabot kini didto? Sultihi ko basi sa siyensya kung asa naggikan kadto nga harina. Asa naggikan kadto nga lana? Unsa man nga nakasulod kadto sa maong tibud-tibud? Gihurot niya og bubo kadto, matag buntag. Gihurot niya ang harina sulod sa tadyaw, matag buntag, ug wala na’y sulod kadto. Apan sa pagbalik niya aron mokuha pa, may sulod na usab kadto. Asa man kini nagagikan? Toohi lang ang Dios sa Iyang Pulong. Kinahanglan sigurado ka sa Dios. Siya mao ang Magbubuhat.

118 Mahimong nawala na kanimo ang maayo mong panglawas. Mahimong wala na kanimo ang imong pagpakig-fellowship. Toohi Siya sa Iyang Pulong. Kinahanglan sigurado ka nga Siya Dios. Ang daw sa mangiub nga panahon karon, mahimong dili na ingon niana kangiub kung toohan mo lang ang Iyang Pulong ug kinahanglan sigurado ka nga Siya Dios.

119 Didto sa Germany, usa ka higayon, nakakita ako’g usa ka larawan, ug sugod niadto dili ko na kini malimtan. Usa ka taga-Germany nga pintor ang nagpinta kaniadto sa . . . usa ka larawan nga—nga gitawag og “Ang Kayutaan Sa Panganod.” Ug pagmakita mo kini, gikan sa halayo, daw sa pinakamakalilisang-lantawon kadto nga kangiub nga makita ninyo sukad. Bagá nga mga panganod nga nagkapatong-patong, pagtan-awon mo kini

gikan sa halayo. Apan pagnagakahaduol ka na niini, nagakausab kini. Mga pako man diay kini sa mga Manolunda nga sa dungan ginakapa-kapa nila, nga nagakanta og mga alleluya ngadto sa Ginoo. Busa ingon niana ang kangiub usahay. Kon tan-awon mo kini, sa halayo, mangiub ug mangitngit kini kon tan-awon. Apan toohi ang Dios sa Iyang Pulong ug kinahanglan sigurado ka nga Siya Dios, ug pagduol ngadto niini, makaplagan mo nga mga pako lang diay kini sa mga Manolunda nga sa dungan nagakapa-kapa.

¹²⁰ Medyo sama siya kang Abraham kaniadto, tinawag aron ihatag ang tanan nga aduna siya, nga ibutang kini ibabaw sa altar sa pagsakripisyo. Mahimong tinawag ka tingali nga sama niana, ning buntaga. Isurender ang imong mga gawi. Isurender ang imong dili-pagtoo. Isurender ang tanan nga aduna ka. Ug dayon kuhaa ang Lana ug ang Pulong, ug ipangsagol Kini, ug ibutang Kini diha sa altar sa pagsakripisyo-sa-kaugalingon. Makaplagan mo, pagatawgon Niini ang Dios ngadto sa esena, sa ingon ka sigurado sama nga nagatindog ako niining pulpito.

Pamalandunga ninyo kini samtang magaaampo kita.

¹²¹ Aduna ba mo'y mga panginahanglan karon? Aduna ba mo'y panginahanglan nga labaw pa kay sa mahimo ninyong maangkon sa pisikal? Halos wala ka na ba'y kuwarta nga dili ka na makabayad sa imong girentahan? Ang mga anak ba nimo nagkinahanglan og bag-ong mga sapatos, ug wala ka'y kuwarta aron mapalit kini? Wala na ba'y sulod ang tadyaw diha sa imong balay, ug ang tibud-tibud halos nga mahutdan na? Dili ka na ba makapalit og mga ipakaon sa imong gialima nga mga mananap? Ug, aduna ba, may problema ba? Hinumdumi, nagsaad Siya.

¹²² Masakiton ka ba, ug nagaingon ang doktor nga kinahanglan ka nga maoperahan? Wala ka ba'y kuwarta aron mapahigayon kini? May panginahanglanon ka.

¹²³ Usa ba ikaw ka makasasala? Daku ba ang imong panginahanglan, nga nahibalo ka nga kung manawag ang Dios, karon, dili ka maluwas? Usa ba ikaw ka backslider nga nagapahalayo sa Dios? Ug nasayod ka nga miyembro ka sa kung unsa nga iglesia, apan nahibalo ka nga dili ka husto? Ang konsensya mo mismo ang nagasulti kanimo, sumala sa Pulong, nga dili ka husto. Ug aduna ka'y panginahanglan. Ayaw tugoti nga mahulog kini nga mga pulong ngadto sa tunokon nga yuta, o diha sa mga bato, batohon nga kasingkasing. Hinaut nga mahulog kini diha sa maayo, mabungahon nga yuta.

¹²⁴ Kung aduna ka'y sakit ug ikaw . . . ang doktor nagaingon nga dili ka na gyud maayo, ug nagasaad ka sa Dios nga imo Siyang alagaron sa tanan nga adlaw sa imong kinabuhi, ug sigurado ka gayud nga Siya Dios, ari ka tumana ang Iyang gikinahanglan. Kung may panginahanglan ka, mahimo mo ba usá nga ipataas mo lang ang imong kamot ngadto sa Dios, nga aduna ka'y

panginahanglan nga usa ka butang? Ang Dios magapanalangin kanimo.

Mag-ampo kita.

¹²⁵ Oh Ginoo, sa ingon ka sigurado nga ania ako niining pulpito karong buntaga, nasayod ako nga wala ni usa sa nianang mga kamot ang magpataas nga wala Ka nahibalo niini, kay Ikaw mao ang Dios. Nag-ingon Ka, “Dili ba nga ingon ka daghan sa gagmay’ng mga langgam ang ginabaligya man lamang sa usa ka diyut? Unsa na kamo ka labaw pa kay sa usa ka gamay’ng langgam!” Unsa na ka labaw pa nga makita Mo ang mga kamot nianang mortal nga mga binuhat, nga gipakamatyan sa Imong Anak nga si Jesus! Unsa na kaha ka labaw pa nga makita Mo ang ilang mga kamot kay sa usa ka gamay’ng langgam, kung mahulog man kini karong buntaga! Sa hunahuna ko . . . usa ka dosena ka gamay’ng mga langgam, dili kini mahibaligya sa usa ka sentimo ning buntaga, tungod nga wala ma’y manginahanglan kanila. Ug magkaaduna pa’y problema sa paglubong kanila. Apan nakaila Ka sa matag usa kanila; nasayod Ka sa matag balhibo nga anaa sa ilang lawas. Nasayod Ka sa kada buhok nga anaa sa among ulo.

¹²⁶ Oh Ginoo, tubaga ang pag-ampo. Tugoti nga makasigurado sila, ning buntaga, nga Ikaw ang Dios, ug ang Espiritu Mo Kini. Hinaut nga ang kadulum ug ang pagkamadanihon sa niining pang-moderno nga relihiyon mawagtang diha kanila, nga nagaingon, “Oh, miyembro ako sa usa ka *ingon-ani* nga iglesia.” Dios, hinaut nga mawala kana gikan sa ilang hunahuna, karon mismo. Sa niining usa ka takna, hinaut nga madaklitan nilang makita ang Kinabuhing Walay Katapusan. Ug dayon nga pangitaon nila ug uhawon sa Niini, nga maila nila kung unsa ang Dios, ug masigurado nila nga Siya mao gayud. Ginatuman Niya ang Iyang Pulong.

¹²⁷ Sa makasasala, hinaut nga maghinulsol sila dayon, mangandam alang sa bautismo sa Ngalan ni Jesus Cristo. Ug nagsaad Ka nga ihatag Mo kanila ang Espiritu Santo. Giingon Mo kini, Ginoo. Ginatuman Mo ang Imong saad.

¹²⁸ May backslider nga nakasigurado kaniadto nga Ikaw ang Dios, ug napahilayo na sila. Hinaut nga mangduol sila karon, tungod kay nag-ingon Ka, “Bisan unsa pa ka pula ang inyong mga sala, sila pagapution ingon sa nieve; lubos man ka mapula, sila mahimong sama sa maputing balhibo sa carnero.”

¹²⁹ Ug kung aduna man og mga masakiton, hinaut nga maamgo nila nga Ikaw ang Dios. Ginatuman Mo ang Imong Pulong. Kinahanglan Mong tumanon ang Imong Pulong. Samtang nga ginayukbo nila ang ilang kaugalingon, uban sa ilang Lana, ang Espiritu nga anaa kanila nga nagapamahayag nga sila nagatoo. Ug dayon, usab, uban ang Pulong, ang Tinapay sa Kinabuhi nga naipahayag, si Cristo; nga ginadugmok ngadto kanila, diha sa

Daang Tugon; ug diha sa Bag-ong Tugon, aron ipakita nga Siya mao sa gihapon kagahapon, karon, ug hangtud sa kahangturan. Hinaut nga ilang isagol kana nga Pulong uban sa Lana, ang Espiritu, nga anaa kanila, dayon motindog diha sa altar, nga nagaingon, “Mao na lang gayud kini ang aduna kanako, Ginoo. Ginadala ko kini.”

Oh, daw sa unsa Mo kini nga mapadaghan pa gayud! Daw sa unsa niini pagatawgon ang Dios sa kasaysayan sa nianang maong esena! Daw sa unsa niini patindogon si Jehova, nga nagabukad ang kasingkasing, nga, “Aduna Ko’y anak nga magmasinugtanon Kanako. Gisulayan Ko na siya, ug napamatud-an niya nga nahigugma siya Kanako ug nagatoo siya Kanako. Sigurado gayud siya nga Ako Dios.” Kay giingon na kini, “Ang nagatoo sa Dios kinahanglan gayud nagatoo nga mao Siya, ug nga Siya mao ang magbabalus sa mga nagapangita Kaniya.” Itugot kini, ning orasa, samtang nga ginatugyan namo kini diha Kanimo.

¹³⁰ Ug, karon, samtang nagduko ang atong mga ulo. Ug kadtong mga may panginahanglan og unsa man, mahimo ba kamong motindog, nga gustong ibutang. . . Karon, kung dili ka sigurado nga Siya Dios. . . Kung sigurado kamo nga Dios Siya, nga pagatumanon Niya ang Iyang saad, nga kaluwasan, nga pag-ayo, kon unsa man kini, kung sigurado kamo nga Siya Dios, magtindog kamo. Kung aduna kamo’y uban pa nga gustong igaampo, magtindog kamo. Kung kamo—kung kamo sigurado nga Siya Dios, ipahibalo ang inyong hangyo sa katiguman sa mga balaan. Ginahimo ninyo kini sa diha nga nagatindog kamo sa inyong. . . [Blangko nga bahin sa teyp—Ed.]

“Sigurado gayud ako nga Siya Dios. Nagatoo ako nga ginatuman Niya ang Iyang Pulong. Ug sigurado ako nga ang akong hangyo. . . Ako na kining ibutang ilalum sa Dugo, karon mismo.” Kung buhaton mo kana, ibutang dinha ang matag sala. Ang matag sala mao ang dili-pagtoo. Tingali usa ikaw ka miyembro sa iglesia, apan ang pasabot ko mao ang sala, ang imong “dili-pagtoo.” Imo kining ginabutang dinha ingon nga usa ka halad. Igahalad mo kini. Nagaduol ka sa krus. Imong igahalad, karon, ang tanan mong dili-pagtoo. Ug igatugyan mo kini ngadto Kaniya, ug nahibalo nga Siya mao gayud, ug sigurado ka nga Siya magatubag. Kung ikaw ingon niana, ipataas ang imong kamot. Magpabilin nga ingon niana.

¹³¹ Ginoo, Dios Ikaw. Ania ang ilang Lana ug ang ilang Mais, nga gipangsagol na. Ginadala nila Kini ngadto sa krus, kon diin mokanaug ang Kalayo sa Dios dinha sa ilang mga kasingkasing (kung sinsero gayud sila niini) ug lamyon kana nga halad. Magalihok Ka diha sa maong esena, paugahon ang tubig diha sa panit niini. Nagaanhi gikan sa Langit, diha sa usa ka carro sa Kalayo. Imong pagatay-ogon ang mga langit ug yuta, aron gantihan sila.

¹³² Samtang nanagtindog sila nga gipataas ang ilang mga kamot, sa pagpatimaan nga sila nagatoo, ug gipangpahimutang dinha ang ilang mga kaugalingon, ug ang matag hangyo nga aduna sila, dinha mismo sa Imong altar. Oh Dios sa Langit ug yuta, ang Maghuhukom sa mga Langit ug yuta, sigurado nga pagkamatarung ang buhaton sa Maghuhukom sa Langit ug yuta. Siguradong tumanon Niya ang Iyang Pulong, Ikaw Nga nasayod sa mga kasingkasing sa mga kalalaken-an, sa mga kasingkasing sa mga kababayan-an, sa mga kasingkasing niining mga tawo.

¹³³ Ginoong Dios, akong ginapataas ang akong mga kamot, tungod kay nasayod ako nga may pagbag-o karon ang akong ministerio. Ug nagatoo Ako nga Ikaw gayu'y Dios. Nakita ko Ikaw nga anaa nianang Haligi nga Kalayo. [Ginatuktok ni Igsoong Branham ang pulpito sa makatulo nga higayon—Ed.] Nakita ko Ikaw nga ginahibalo ang mga tinago sa kasingkasing sa mga tawo. Wala ni usa ka higayon nga napakyas Ikaw. Gisaad Mo kini niadtong gihimo Mo kini didto, sa pikas bahin lang nga dalan dinhi, sa diha nga una Kang nagpakigtigayon sa pagbuhat niining mga butanga. Ug gipanalipdan Mo ako sa paglibot ko sa tibuok kalibutan, ug sa pagbalik-balik ko sa paglibot. Sigurado gayud ako nga Ikaw Dios. Sigurado gayud ako niana.

¹³⁴ Ginahalad ko ang akong kaugalingon uban niining mga tawo, ug sa pagsakripisyo sa tanan nga aduna kanako, Gino, nganha Kanimo, alang sa pag-alagad. Magasugod na usab ako, Gino, sa paglibot sa kalibutan. Tabangi ako, oh Dios. Kung wala ko Ikaw natoohan sa unsa mang higayon, pasayloa ako sa akong mga kasal-anan. Pasayloa ako sa akong mga dili-pagtoo. Nahibalo ako nga Ikaw mao gayud, ug nagabalus sa kadtong mga nagapangita Kanimo.

¹³⁵ Mao usab, nga akong ginapangumpisal ang mga kasal-anan sa akong mga katawhan, karong buntaga, ang ilang mga kaluyahon ug ang ilang mga pagpangduhaduha, samtang nagatindog sila nga gipataas ang ilang mga kamot. Ginakumpisal ko ang ilang mga kasal-anan, Gino, ug ang tanan namong mga kaluyahon. Ipadala kanamo ang Espiritu Santo, nga may selyo sa Imong pagpamatuod, nga Ikaw Dios. Ug ania Ka karon aron dawton kami, ug aron nga kugoson kami diha sa Imong mga bukton, ug aron tubuson para kanamo ang tanan nga nahiwala namo. Kung kini man mao ang among maayong panglawas, hinaut nga mahibalik kini sa usa ka gatus-ka-pilo. Kung ang kalag man namo kini, hinaut nga mabag-o kini diha kanamo nga usa ka nagalimbukad, nagasidlak nga butang, puno sa Espiritu Santo, aron igapresentar sa atubangan sa Dios. Kung kini man mao ang dili-pagtoo, hinaut nga mobalik na usab kini kanamo, Gino, nga may pagtoo na nga arang makapabalhin og mga bukid. Itugot kini, Gino.

¹³⁶ Nagatoo kami nga nagapanglihok Ka, ang Balaang Espiritu nga nagapuno sa tibuok niining bildinga, sa niining mga tawo,

ug diha sa ilang mga kasingkasing, ginapalihok sila aron dawaton ang buhi nga Dios. Ginapangamuyo namo kini diha sa Ngalan ni Jesus Cristo.

My Faith looks up to Thee,
Thou Lamb of Calvary,
Saviour Divine;
Now hear me while I pray,
Take all my sins away,
Nor let me ever stray
From Thee aside.

¹³⁷ Sinsero ba gyud mo niini? Ginadawat ba ninyo kini? Ipataas ang inyong kamot, ingna, “Ako kini karon ginadawat. Nagatoo ako.”

While life's dark maze I tread,
And griefs around me spread,
Be Thou my Guide;
Bid darkness turn to day,
Wipe sorrows fears away,
Nor let me ever stray
From Thee aside.

Iduko nato ang atong mga ulo.

¹³⁸ Human niining estrikto, mahait nga Mensahe; mabangis, ug gipahayag sa masagalsalon nga paagi, apan ang Kamatuoran kini. Ug kung mapainubsanon nga ginatoohan ninyo kung unsay inyong gipangayo, nga inyo gayud madawat, ayaw gayud tugoti ang bisan unsa man nga butang nga itukmod kamo pagawas gikan nianang tul-id nga dalan. Magpabilin kamo dinha mismo. Bisan unsaon ko pa pagwali, bisan unsa pa'y buhaton ko, o bisan unsa man ang buhaton ni kinsa man nga tawo, dili gayud kini mo-epekto hangtud nga inyong dawaton kini ingon nga kaugalingon ninyong panag-iya.

¹³⁹ Toohan ninyo kana sa tibuok ninyong kasingkasing, ang tanan nga inyong gipangayo. Kung inyo nang gikumpisal ang inyong mga kasal-anan, gipasaylo na kamo sa Dios. Dili na gayud ninyo kini duhaduhaan pa. Kung usa ikaw ka backslider, napahibalik ka na, niining buntaga. Kung gikinahanglan mo ang Balaang Espiritu, kung ingon-ana magpabautismo ka sa Ngalan ni Jesus Cristo alang sa kapasayloan sa sala. Pulong kana sa Dios. Dili Niya gayud Kini pagausabon para sa kung unsa man nga iglesia, para sa kung unsa man nga denominasyon, o para sa kang kinsa man. Kinahanglan ingon niana gayud Kini. Kinahanglan nga atong tumanon ang Iyang mga gikinahanglan, dili ang mga gikinahanglan sa iglesia, ang Iyang mga gikinahanglan gayud. Kana ang kinahanglan natong buhaton.

¹⁴⁰ Nag-ingon Siya, “Ang pag-ampo nga inubana'g pagtoo magaluwas sa masakiton.” Kung ikaw masakiton, ako nang

giampo alang kanimo ang pag-ampo nga inubana'g pagtoo. Giampo mo na kini diha sa kaugalingon mong kasingkasing. Ug toohi kini, dawata kini, magpadayon ka nga malig-on niini. Sigurado gyud nga mamaingon niana kini. Walay bisan unsa man nga makailog niini, bisan daw sa unsa pa kangiub kini kon tan-awon.

¹⁴¹ Moingon ka, “Bueno, daw sa aduna pa man ako’y sakit.” Wala na kana . . . Mga pako lang kini sa mga Manolunda nga nagkapa-kapa pagdungan. Ingon niana lang. Ang Dios kini diha sa usa ka porma sa panalangin. Daw sa mangiub kini kanimo. Pagduol niini ug tan-awa kini pag-usab, makita mo kung dili ba ang Dios kini nga nagatindog dinha, nga ginatuman ang Iyang Pulong.

¹⁴² Karon samtang nga ginaduko nato ang atong mga ulo, ako nang itugyan ang panerbisyo ngadto kang Igsoong Neville, ang atong pastor.



KINAHANGLAN SIGURADO KA SA DIOS CEB59-0125
(Be Certain Of God)

Kining Mensahe ni Igsoong William Marrion Branham, una giwali sa Ingles niadtong Domingo sa buntag, Enero 25, 1959, sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2014 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org